

武宣縣志卷十三

紀事 目錄

軍警

軍務

元年事畧

武宣縣志卷十三

紀事 目錄

一

梧州商業日報承印

武宣縣志卷十三 紀事

軍警

明 洪武間馬步兵一千二百名萬歷間僅存一百三十名
清

雍正八年武宣由柳州改屬潯州爲潯州協左營防地

分防武宣縣城汛把總一員帶兵二百一十九名（光緒朝僅存步兵六名守兵三十名）駐守城池及各塘汛

協防武宣濁水汛外委一員駐來賓江口帶水師分巡各要隘（光緒朝僅存守兵十一名）

防務

縣城東南西北四城門各設兵十名

南路陸防

武宣縣志卷十三

紀事 軍警

二

梧州商業日報承印

大樟汛（距城八十里界貴縣）猺欄汛（距城四十五里界來賓）各設兵二十五名
五屯寺村汛（距城六十里）設兵十名

北路陸防

牛欄塘（上至象州三十里）花山塘（上至牛欄三十里）官橋塘（上至花山十五里）巖崗塘（上至官橋十五里）大橋塘（上至巖崗十里）平畚塘（上至大橋十里）各設兵三名

江防

勒馬哨水師設把總一員江口哨水師設外委一員兵十二名俱久廢

上游江防

黃花塘（在縣上游十里）簣村塘（黃花上十五里）菱角塘（簣村上十里）菱角子塘（菱角上十里）岐岡塘（菱角子上十）各設兵三名
排樓塘（岐岡上十里）思流塘（排樓上十里）江口塘（思流上十五里）良村塘

(江口上十五里)金鷄塘(良村上二十里去象州沙灣二十里)各設兵四名
下游江防

舊縣塘(縣城下游二十里)設兵三名滑石塘(舊縣下十里)設兵四名勒馬塘
(滑石下二十里)設兵六名馬來塘(勒馬下十里)設兵四名橫木塘(馬來下十
里)設兵六名浪灘塘(橫木下五里)大片塘(浪灘下五里)各設兵三名洪石塘
(大片下十里)設兵四名中灣塘(洪石下十里)設兵三名

以上錄高志嘉慶以前事也(按陸防江防各塘設兵均有汛地一所以築兵房園
址而資守禦雖久圯猶可查訪而知也)

道咸後各汛塘兵漸次更廢清末裁綠營原設把總二員均撤陸路用巡防營隊隨
時更調駐防水路設水師江口菱角牛皮西津勒馬游瀧那珠洪石等處均派巡船
駐防每巡船設艙長一員水勇十名又於江口菱角牛皮勒馬游瀧等處江岸建築
礮樓分駐水勇與巡船互相犄犄

土兵 鄉勇三十名鄉兵四十名田三十頃十六畝零兵久弛田待查

民壯三十名備官廳防捕之用清末廢

民國軍警

民國成立後駐防軍隊仍由都督隨時調度

二年八月撤柳潯水師改編游擊隊併用護商營酌駐柳潯沿岸各要隘以保河道
縣知事奉政府命令因前清縣官設親兵四十名改爲警衛兵

軍務

晉

愍帝建興三年交州刺史顧秘卒州人以秘子壽領州事帳下督郵梁碩起兵攻壽殺之碩遂專刺交州王機自以盜據廣州恐王敦討之更求交州會杜宏詣機降敦欲因機以討碩乃以降杜宏爲機功轉交州刺史機至鬱林碩迎前刺史修則子湛行州事以拒之機不得進乃更以杜宏及廣州將溫邵交州秀才劉沈謀復還據廣州陶侃至始興州人皆言宜觀察形勢不可輕進侃不聽直至廣州諸郡縣皆已迎機矣杜宏遣使爲降侃知其謀進擊破之遂執劉沈於小桂（通鑑注秦置桂林郡漢武帝改曰鬱林郡治布山桂林屬焉吳孫皓三年立桂林郡因謂桂林爲小桂胡志小桂今武宣縣）

明

洪武二十八年奉議南丹等處蠻人梗化都督楊文攻破之賊衆潰散左副將軍韓武宣縣志卷十三
觀等遂分兵追討都康向武富勞上林諸州縣破其更吾蓮花大藤峽等寨擒武士官黃世鐵并其黨萬八千三百餘人招降蠻民復業者六百四十八戶徙置象州武仙縣蠻寇遂平明史土司傳

帝命楊文統大軍討龍州土州趙宗壽以唐鐸參議軍事逾月諸蠻平鐸相度形勢請設奉議衛取向武河池懷集武仙賀縣諸處守禦千戶所鎮以官軍皆報可明史唐鐸傳

永樂三年黃田等獠累行劫掠二月遣兵部尙書徐子良等論武宣雒容二縣民黃田等及荔蒲民廖均用等各復原業永爲良民若怙終不悛調軍蕩除粵西叢載左副將軍韓觀偵安南柳潯諸蠻乘觀出復叛五年六月觀旋師柳州賊望風遁匿觀請俟秋涼深入且請濟師帝使發明湖廣東貴州三都司兵又敕新城侯張輔遣都督朱廣方政以征交趾兵協討十月諸軍皆集分道進勦觀目以貴州兩廣兵由柳州攻馬平來賓遷江上林羅城融縣皆破之會兵象州復進武宣東鄉桂林永福

斬首萬餘級擒萬三千餘人羣蠻復定捷聞帝嘉勞之明史韓觀傳

九年賓州遷江縣象州武宣縣古篷等洞蠻獠作亂詔發柳州南寧桂林等衛兵討之明史土司傳

成化二年韓雍平斷藤峽疏一看得武宣東鄉係斷藤峽後門每年柳慶等處入峽糾合出境打劫俱從本處經過原不會設有巡司衙門守把及斷藤峽上水江口地名周冲巡檢司除有流官巡檢見在其衙門趾脚在峽內與江口隔遠積年爲賊所據道路不通不能建立衙門俱係缺典臣等訪得土人李昇廖政胡扶清俱衆所信服堪任副巡檢近又俱領兵運糧殺賊有功合於武宣東鄉開設巡檢司除授流官巡檢掌管以土人李昇爲副巡檢俱協同管事合用弓兵就於本鄉照例編僉周冲巡檢司衙門在斷藤峽上水江口勒馬灘以土人廖政胡扶清俱爲副巡峽弓兵就於本處僉撥各宜本處築立城堡量撥軍兵守把遞接盤詰庶使峽內道路永通賊人不敢出入

成化七年周琦條陳地方利病疏武宣縣對江大路與貴縣山東里武宣武賴里正當大路俱原設有巡檢司衙門各弓兵三十二名巡捕地方亦原有軍堡保障百姓今百姓俱在居住道路行人不絕軍堡反廢其巡司衙門止貴縣山東里巡司有官在鎮弓兵亦無巡捕武宣縣武賴里縣廓鎮巡檢司官在縣內居住衙門棄爲草莽凡官員使官往來止憑武賴里老人往來護送乞行廣西巡按御史及分巡分守等官各勘相應合無武宣縣武賴里貴縣山東里二處巡檢司照舊立鎮巡捕巡檢不許在縣居住同弓兵巡捕地方以安百姓護送往來庶幾舊有衙門者得歸復原地其民有依矣

藤峽始末

洪武八年潯州大藤峽獠賊竊發柳州衛官軍擒捕之二十一年知府沈信言府境連柳象鬱梧藤等州山谷險峻獠賊出沒不常請以桂平平南二縣舊附獠民選其少壯千餘人各團村寨置烽火與官兵相爲聲援帝以蠻夷梗化夙昔固然但當謹

其防禦使不爲患如爲寇不已則發兵討之何必團寨永樂三年總兵韓觀奏桂平縣蠻民爲亂請發兵勦捕帝命姑撫之勿用兵宣德四年總兵山雲討潯柳二州寇並誅從寇二千四百八十人梟首境上七年雲奏斬獲桂平等縣蠻寇覃公專等首級數百帝顧左右曰蠻寇害我良民譬之蝨賊害稼不可不去然殺之過多亦所不忍雖彼自取滅亡朕自以天地之心爲心也九年雲奏潯州等處蠻寇劫掠良民指揮田眞率兵於大藤峽等處前後斬首九十六級歸所掠男婦二百三人正統元年兵部尙書王驥奏桂平大藤峽等處蠻寇劫掠鄉村因調廣東官軍二千人今已逾年軍器衣裝損壞宜如貴州諸軍予踐更從之二年山雲奏潯州府平南等縣耆民言大藤峽等山獠寇不時出沒入劫掠居民阻絕行旅近山荒田爲賊占耕左右兩江人多食少其狼兵素勇爲賊所憚若選委頭目屯種近山荒田斷賊出入之路不過數年賊徒坐困地方寧靖已會同巡按諸司計議派撥田州等府族目土兵分界耕守卽委土官都指揮黃竑領之遇賊出沒協同勦殺從之七年獠賊藍受貳等恃

所居大藤峽山險糾集大信等山山老山丁數百人遞年殺掠千戶滿智等誘殺十人帝命梟之家口給賜有功之家十一年大藤峽蠻賊流劫鄉村侵犯州縣巡按萬節以聞景泰七年大藤峽賊糾合荔蒲等處賊劫掠縣治殺擄居民命總兵柳蒲等勦之天順五年鎮守廣東中官阮隨奏大藤峽獠賊出沒兩廣爲惡累年邇來逾甚雖常會兵勦捕緣地理遼遠且兩廣兵馬不甚統屬未易成功宜大舉擣其巢穴庶絕民患乃命都督僉事顏彪佩征蠻將軍印調南京江西及直隸九江等衛官軍一萬隸之六年彪奏臣率軍進勦大藤峽攻破七百二十一寨斬首三千二百七十一級復所掠男婦五百餘口帝勅獎之七年大藤峽賊夜入梧州城駕梯而上縱之出都指揮刑斌奏至帝曰梧州蕞爾小城總兵鎮巡三司俱擁重兵駐城中乃爲小賊所箴視况遇大敵乎爾兵部卽議處行八年國子監生封登奏潯州夾諸山峇岸巖業峽中有大藤如斗延亘兩崖勢如徒杠蠻衆蟻渡號大藤峽最險惡地亦最高登藤峽巔數百里皆歷歷目前軍旅之聚散往來可顧盼盡諸蠻倚爲奧區自景泰以

來嘯衆至萬人隳城殺吏修仁荔蒲平樂力山諸猺應之其勢益張渠長候大狗嘗懸千金購莫得鬱林博白新會信宜興安馬平來賓亦煽動所至坵墟爲民害乞選良將多調官軍狼兵急滅賊報聞成化元年編修邱濬條上兩廣用兵機宜兵部尙書王竑奏薦浙江叅政韓雍率師討之時大藤峽賊三千餘陷平南縣殺典史周誠擄其妻子并劫縣印又入藤縣城掠官庫劫縣印鎮守總兵歐信以聞於是總兵官趙輔率軍至奏言大藤峽蠻賊以修仁荔蒲爲羽翼今大軍壓境宜先剿之乃合諸軍十六萬人分五道進先破修仁窮追至力山生擒千二百餘人斬首七千三百餘級二年趙輔韓雍等奏元年十一月師次潯州謀深入以覆其巢遂調總兵官歐信等分兵五哨取道山北以進臣指揮白全分兵八哨直抵潯州以擣山南復令叅將孫震分兵二哨從水路入別遣指揮潘鐸等以兵分守諸山隘口尅期十二月朔日水陸路並進腹背交攻賊知師至先移妻子錢米入桂州橫石塘等處藏匿乃於山南各寨柵自固用木石鏢鎗藥弩憑險拒守官軍用團牌扒山虎等器魚貫而進士

殊死戰一日之間攻破山南有 崗沙 古營諸巢縱火焚其積聚賊皆奔潰復遣兵追躡剷山開路直抵橫石塘及九層樓等山賊已據險立柵數重復用木石鎗弩拒守臣等多設疑兵誘賊拋擲木石幾盡別遣壯士於賊所不備處高山絕頂舉礮爲號諸軍緣木攀蘿蟻附而上四面夾攻連日鏖戰賊不能支破賊寨三百二十四所斬首三千二百七級生擒七百八十二人獲賊婦女二千七百一十八人戰溺者不可勝計已將大藤峽改爲斷藤峽刻石記之以昭天討捷聞帝降敕褒諭仍敕轉計議長策永絕後患未幾雍奏斷藤峽殘賊侯鄭昂等七百餘人夜入潯州府城焚軍營城樓奪百戶所印三顆殺擒男婦數十人旋爲叅將孫震指揮張英率軍擊斬賊魁餘黨仍奔入巢旣雍又奏諸猺之性憚見官吏攝以流官終難靖亂請改設武宣縣東鄉等巡檢司設武靖州於峽內正德十一年總督陳金復督調兩廣官軍土兵分爲六大哨按察使宗璽布政司吳廷舉副總兵房閏鎮守大監傅倫叅將牛桓都指揮魯宗貫王瑛將之水陸並進斬首七千五百六十餘級金謂諸蠻利魚鹽乃

與約商船入峽者計船大小給之魚鹽蠻初獲利聽約道頗通金以此法可久易峽名永通峽諸蠻緣此無忌大肆掠奪江路爲斷時總督王守仁定田州還兩江父老遮道言峽賊阻害狀守仁上疏請討報可守仁率湖兵至南寧約日會兵寇聞湖兵且至皆逃匿守仁故爲散遣諸兵狀寇弛不爲備乃令官軍突進連破油榨石壁大皮等寨賊奔斷藤峽復追擊破之賊奔潰黃石江溺死六百餘人俘斬甚衆賊潰散遂移兵僊臺花相白竹古陶羅鳳諸處賊不支奔入永安力山官軍次第破之擒斬三千餘俘獲無算八寨平兩江悉定守仁遂以土官岑猛子邦佐爲武靖知州使撫遺孽邦佐不能輯衆且貪得賄賊賄峽北賊復獬有侯勝海者爲首指揮潘翰臣誘殺之勝海弟公丁聚衆譟城下後至二千餘人乘夜陷堡城殺戍兵二百人貴香走免命侍郎蔡經總兵討之會朝儀欲征安南事遂已公丁等益橫出殺掠之經乃會安遠侯柳珣決計發兵以兵事屬副使翁萬達翁萬達廉得百戶許雄通賊狀詰之雄懼請自効遂逮公丁磔之嘉靖十八年二月官軍南北夾擊左軍王良輔由牛渚灣

越武靖攻紫荆大冲諸巢朱昇田三等村渡蓼水攻二驢石門諸巢右軍馬文傑由武宣順流攻碧灘綠水諸巢王傑由武宣踰山而東攻羅綠上崗賊大營奔竄諸軍合擊大破之斬首千二百級追至羅運山斬首百餘級平南縣有小田羅應古陶古思諸獠亦據險不靖萬達移兵勦之招降賊黨二百餘人江南胡姓諸獠歸順者亦千餘人藤峽復平隆慶三年左江諸獠獞得亂巡撫郭應聘請給餉勦除給事中梁問孟以賊黨不可盡滅宜令守臣熟計兵部言府江自正德十二年都御史陳金征討之後且六十年而右江北三北五等巢素未懲創生齒日繁遂肆猖獗頃者大征古田各巢咸畏威殲戢獨府江右江恃險爲亂若復縱之非惟無以固八寨懷遠之招亦恐以啟古田攜貳之漸勦之便但兵在萬全宜卽以科臣所慮備行提督殷正茂及巡撫郭應聘等使宜行之應聘遂檄總兵官李錫等將兵往討以捷聞節明史

清
康熙十九年庚申六月

水師總兵官譚昇等克復武宣

總督金光祖奏官兵進取武宣逆賊范齊韓等霄遁黃明等猶踞城抗拒水師總兵官譚昇等奮擊大破之斬獲無算遂復縣城得旨嘉獎下部議叙

道光二十九年己酉秋八月知府顧元凱等率勇擊武宣賊陳阿貴敗之

修仁荔浦大股賊竄擾武宣之三里墟副將李殿元督兵進勦阿貴率黨渡河官兵分水陸兩路擊之轟斃並落水死者無算阿貴奔潰元凱等追擊之又斃賊二百名明日官兵四面合攻斃四百餘名阿貴翻山逃至灣龍崗嶺復經遊擊成保副將舒春革職知縣劉益謨薩畢圖各擊斃數百名擒獲一二百名阿貴及其黨鄭廷威逃匿無蹤（採冊云阿貴東鄉平嶺人道光二十九年八月叛擾東鄉表里李勉村以劉觀先爲米飯主劉山猪箭黃糯米四叛應之夥劫象州大樂韋泰山大獲錢布於豐元界散給黨與官捕之急匿於桂平十八山觀先率團掩之至鵬隘界不敢深入遂散已而阿貴糾山猪箭糯米四尋仇東鄉團觀先自以其

酋也往會焉被執殺啖之明年連劫象州白石寺村等處劉李三黃廷龍爲鄉導偕官團追捕阿貴走竄廟王團尾擊於大林復竄桐木至頭排阻于石牆卡遂散黨遁於紫荆之二十四冲廷龍偕官軍搜平嶺巢穴獲其父隘古二及其妻子解縣誅之最後阿貴潛過江聚黨於六蒙山心村桂平武平里團擊於石龍墟大敗斬首二千餘級獲二千餘人武宣知縣劉作肅籍東鄉餘黨二百餘人斬於市）三十年庚戌春正月武宣賊陳阿貴伏誅

阿貴由武宣勾結李弔古兄弟擾桂平武平里石龍墟等處團練截之走渡勒馬河竄匿羅淥洞山中副將李殿元同知吳德徵購綫偵捕樵人識之白碧灘廩生黎建勳並其弟火交擒獻於知縣李孟群誅之

咸豐元年春太平天國洪軍金田起事由新墟趨武宣（錄府志奏章上諭原稿以紀事實）向榮扼守下游洪計無所出二月初八夜退入新墟王謨鄉團劉星旋上珍等以其自大湟江敗潰餘黨也擒獲數十人繫諸樹洪覺之屠王謨鄉星旋

上珍等十三人遂由紫荆趨武宣榮乃移師北河馳象武堵禦洪軍不得由修仁荔蒲趨上復折回東鄉

甲辰清大臣李星沅巡撫周天爵提督向榮奏敗洪軍於武宣東鄉

洪軍自牛排嶺失利後屯聚武宣東鄉一帶三月十七日清兵分路進剿自午至申力戰數時洪軍愈集愈多清軍幾不能支天爵揮奮勇直前手刃退走閩勇二人親率東勇大呼前進清軍乘勢奮擊勇氣百倍殲斃洪軍數十奏至清諭軍機大臣李星沅等奏分剿賊匪情形各摺片周天爵於進剿武宣東鄉逆匪時手刃退走閩勇二人親督東勇前進看其精神矍鑠並非老不能軍見其親歷戎行著即專辦軍務帶兵督飭俾得殫竭血誠捷音迅奏惟逆匪自牛排嶺潰竄之後直走武宣一帶距桂林不遠省垣重地尤宜加意防守著該大臣等體察情形一面兜捕一面嚴防斷不可稍有疏虞致該匪徒乘間而入

夏四月清巡撫周天爵疏陳武宣東鄉軍事

天爵奏賊自焚牛排嶺突竄紫荆山搶雙髻據東鄉東西六七十里複山重嶺實省城水陸通衢蓋柳州象州各大郡之門戶亦通省安危所繫也賊踞東鄉三里墟糧食雖足而水路爲我先據以投誠之張釗及頭目九人統領七百水勇前往防江賊無食鹽烟硝欲拚命速戰謀攻黔兵營潰圍北上是以三月初二日黔兵奮力鏖戰死者最多初八日聞賊欲攻舊縣墟之江口奪渡而報貴縣之仇再迎凌十八劉八兩股萬餘賊是水路所關最多陸路兵將不善操舟又不能舟中用砲斷難抵禦臣向榮鎮臣秦定三熟籌專責釗與之力戰以其長於水戰賊必受創初十日釗果大勝砲斃東岸賊數十且有被擊粉碎者登山望伏賊歷歷可指其欲攻秦定三營者布滿山谷是賊用一股南出以偏師牽動大營而乘虛北上也臣等晝夜水路梭巡於深林澗谷江畔之地多獲奸謀供稱賊欲明攻舊縣江口而暗攻勒馬遂飭釗等備之故釗以少船守勒馬而以多船藏山脚嚴陣以待未幾賊果大敗傷斃二十餘人水勇受傷者一人見在賊情惟韋政洪秀全蕭朝

貴馮雲山楊秀清胡以琯曾三秀頭目數十人而洪秀全馮雲山爲最營皆散處戰亦散布卽敗不至大創皆猾賊之尤著此時兵力不足宜專理坐戰之法力餘則連營偪進總以大圍攻成小圍步步偪緊使之步步縮歸要在驅諸羅淥洞聚而殲之若猝然擊之縱使獲勝仗必有脫逸見在暗中四面分竄恐成流賊之勢是一戰之功小致賊之四出罪大也賊情不在速戰而在固守我兵以靜待動以逸待勞庶軍心和而士氣固矣奏至清諭軍機大臣等周天爵奏急獎有功並陳目前賊情各摺片據奏賊踞東鄉三里墟食鹽烟硝斷絕勢不能不出而速戰以圖潰圍北上其窘迫情狀如見其肺肝見因兵力不敷力持固守之說徐圖連營偪進將各股賊匪驅入羅淥洞然後聚而殲之周天爵親歷行間所見自有把握惟賊狡獪務當嚴飭我兵防堵周市設百密而一疏致令突圍竄逸與凌十八劉八合謀則勦捕更爲棘手矣張釗投誠立功現已俯准所請給以優賞此輩性情不定設有游移反覆關繫匪輕該大臣等先當示之以誠令無疑懼使脅從之衆

悔罪來歸亦以賊制賊之一法至田芳誠之後有無立功之處其餘頭目能否同心効命均著確查隨時奏聞所請調取遣軍流犯協勦一節向來辦理軍務兼用遣勇亦取其剽悍性成於衝鋒破陣可期得力但須善爲駕馭勿令別滋事端其周濤韋允升二人已極力爲申辦諒能長軍旅之事亦難盡選全材也至所保紳民單內各職員究係何官何職且未有聲明籍貫者著查明具奏前次賀縣勦匪遇伏之後賊勢如何是否再有接仗在鄰省會籌協勦情形如何著手一併覆奏以慰廛念賊首韋政洪秀全馮雲山蕭朝貴楊秀清胡以琯曾三秀等旣訪得確實知其習教伎倆卽當設法懸賞購綫使賊自猜攻勦更易得手該大臣總宜相機籌辦毋令日久勾結再致蔓延爲要將由四百里各諭知之

清諭大臣李星沅視師武宣會籌勦辦

清諭軍機大臣李星沅奏親往武宣會籌勦辦一摺武宣大股逆匪旣探明欲分三路逃竄武宣與象州唇齒相依爲全局筭鍵全在該大臣相度地勢調度得宜

李星沅見由象州至武宣與周天爵向榮悉心商確當探明賊蹤將何處衝突卽先行扼要布置設奇制勝該大臣是否合兵一處抑須分路堵剿總宜聲援相應籌畫萬全至後路接應之兵尤關緊要所稱紫荆山一帶僅飭桂平平南二縣帶同壯練巡防未免過形單弱仍當酌量調兵勇嚴密分布以堵奔竄之路毋稍疏虞

清大臣李星沅由柳州視師武宣薨於軍

星沅以諸將不協於武宣調和之疾作疏交關防周天爵而卒先是星沅請簡重臣一事權乃命賽尙阿節制廣西星沅回湖南會辦防堵至是復諭賽尙阿馳接欽差事授鄒鳴鶴巡撫令星沅回籍養病諭至已前卒矣

清巡撫周天爵提督向榮都統烏蘭泰疏陳東鄉軍事

天爵榮等奏賊踞東鄉之尊頭村爲韋逆大淵藪其地西至東嶺三里墟三十餘里賊以東嶺三里墟爲東鄉門戶以台村靈湖爲關欄以山鞍嶺爲域限以莫村

十餘村爲埋伏精銳大半悉萃於此西窺武宣則由涼亭新路口而西北窺象州則由二塘墟大林小林而北其間山徑崎嶇易於竄逸已飭兵勇分番巡緝自二月二十二日至今計擒大小頭目與曾經接戰之賊共二十二入江路自武宣至桂平之碧灘百餘里凡渡口十餘處以水勇七百福勇三百五十晝夜梭巡拏獲大頭目僞右先鋒湯亞尾崇嚮碧灘等處皆因爭渡截殺轟斃淹溺者數百人刻下賊情甚窘所急需者食鹽臣等售入毒鹽致斃者日復不少而我兵勇受瘴病斃亦所在多有俟滇黔兵到休息一二月挑選兵勇一攻東鄉一攻東嶺賊巢可以一鼓偪入羅淥洞中烏蘭泰又奏四月初三日抵武宣軍營訪詢賊情土匪十餘股皆烏合之衆凌十八會匪一股亦類土匪惟武宣東鄉會匪立有僞王僞官名目留髮易服衆至萬餘實廣西腹心之患若將此股殲除各匪不難次第撲滅見在兵力尙單會匪旣凶勇死鬪且伎倆詭譎止可相持嚴堵以待續調之兵再酌量進剿武宣東鄉地勢四圍皆山西臨大江中間平陽不過五六十里間有小

山重嶺其中大小村墟六十餘處東鄉一帶均被賊匪占踞四面隘口早經署撫臣天爵提臣向榮分撥兵勇扼要堵截俟兵力稍齊即可分路進剿奏至清諭該匪以東鄉爲淵藪東嶺三里墟爲門戶見旣賊情窘迫計可聚族而殲周天爵殫竭血誠向榮奮勇出衆烏蘭泰初抵軍營正可會商勦辦此時自以設偵選鋒嚴防賊匪竄逸爲要務卽設法斷其鹽米接濟俾食用無資進攻更易得力兵貴神速亦應持重如兵力不敷斷不可深入重地致墮奸計周天爵等身歷戎行相機籌辦自必計出萬全也

五月戊子洪軍趨象州清巡撫周天爵提督向榮等責降有差

清諭內閣周天爵烏蘭泰奏賊衆竄逸一摺逆匪蟻聚武宣據前奏稱四面圍困將群匪逼入羅淥洞賊巢卽可殲滅何以相持日久仍復任賊竄逸流入象州統兵大員調度乖方咎無可諉周天爵著革去總督御無庸暫署欽差大臣辦理軍務卽回省暫署巡撫事務向榮奏定三均著拔去花翎與周天爵一併交部議處

清巡撫周天爵等因洪軍由武宣趨象州劾鎮將秦定三等並自請嚴議

天爵榮烏蘭泰等奏三月十七日緣貴州鎮總兵秦定三列營在北屬進宮大林以堵北竄象州之路而秦定三力在防堵不肯移營自二月至三月賊屢瞰大小林之路亦屢擒獲四月初十日前後連日大雨臣天爵遣人密入賊偵知數日內賊必北走東嶺由落梅走東鄉大林小林趨象州之廟旺飛檄定三於大林小林倍加防堵定三未發一兵十六日侵晨報稱夜間見大林一帶燈火賊已竄去臣派練勇及貴州兵紮營大林力截北竄之路定三夜間並不接應遲至辰刻並未出兵追勦臣天爵速到黔營定三始帶兵一千北迢又屬貴州平遠協副將周鳳岐出兵接應鳳岐固執不肯會報十六日臣先追之劉季三等勇隊至官轎塘與賊接仗賊無心戀戰當卽追殺定三揮兵三千餘踴躍轟擊戰方得手定三謂兵饑渴斂兵折回衆軍隨之南走經臣等嚴飭始離營再追賊旣全去廟旺都司常啟雲不聽將令阿附定三亦同退回應請旨將定三周鳳岐先行治罪常啟雲革

職拏問楚兵時歷三月並無一戰亦屬玩視湖南靖州協副將博春湖南永綏協副將和春請旨革職仍留軍營効力贖罪臣烏蘭泰到營未久所有督臣不能使將士知畏併力一心皆由臣天爵臣榮之咎並請交部嚴加議處不得置身事外仍在軍營効力天爵又奏提臣向榮本有才氣瞻略因曲徇其子向繼雄楚兵迄不用命乃不自責而反惡詈兵練致失人心又不聽固守竟致僨事可否簡派湖南提督余萬清帶兵勇三千來粵督勦

清諭軍機大臣等前據周天爵等奏武宣逆匪經兵勇分路堵截漸形容迫一俟續調兵到即可一鼓殲擒朕卽恐其鋌而走險諭勿遷延貽誤坐失事機以爲周天爵向榮身歷行間必能相機籌辦乃至賊匪大股潰圍而出僅以參劾鎮將等不受節制懦怯逗遛致令武宣東鄉逆匪兩夜一日全行竄出本應一律治罪姑念勦辦正當喫緊之時均令戴罪自效若再不知感懼臨陣不前軍法俱在不能姑容矣周天爵回桂林省後見在逃竄之逆匪卽責成烏蘭泰向榮督同該鎮將

等同心協力急圖進勦以贖前愆倘再有遲延貽誤定當從重治罪又本日據周天爵等奏鎮將不受節制致賊竄逸等語周天爵勇於任事而不能用人不但失秦定三之心亦難與向榮和衷辦事覽具陳奏概行奏劾並無拊循激勵之方賽尙阿到粵尙須時日若照周天爵所奏全予罷斥治罪此數十日中軍務延誤將誰責乎朕已諭知烏蘭泰務將不和情形密查覆奏又據周天爵單御片奏向榮曲循其子向繼雄軍不用命等語湖南副將博春和春統帶楚兵何以時歷三月並無一戰向榮屢著戰功何以周天爵參共曲循伊子致失人心詳閱陳奏各情皆因統兵大員不和以致觀望貽誤周天爵忠直素著向榮奮勇爭先人所共知而近日徐廣縉亦有參劾該提督諉卸觀望之奏是否實情秦定三之心地朕亦深悉烏蘭泰甫到軍營無所用其回護其所以不和實在情形自己訪察周知是否周天爵不善馭衆致失軍心抑係向榮秦定三等各有徇私觀望之處著卽查明密陳毋稍隱飾

潯州府縣等官以縱洪軍分別革職拏問有差

清諭周天爵奏據控查參潯州府等官請分別革職拏問一摺廣西武宣縣生員王作新前經稟控馮雲山等在桂平習教結盟一案已革潯州府知府顧元凱丁憂桂平縣知縣王烈事前既毫無覺察迨經控告到案又不赴鄉親查嚴行究辦江口司巡檢調補廣東省巡檢王基專司緝捕乃既疏於查察又復任聽賄屬吏治廢弛至此已極必應徹底根究王烈王基均著革職同已革知府顧元凱一併拏問交鄒鳴鶴提同府縣幕友人等嚴訊確情按律懲辦

六月初九日官軍進東鄉

賽尙阿奏六月初四等日中坪賊竄回東鄉舊巢並擾桂平縣之新墟烏蘭泰向榮等連日追勦斃賊頗多初八日賊越嶺分走小路兵壯連施槍礮斃之初九日我軍進逼東鄉斃賊數十烏蘭泰督放火箭策馬當先手槍斃執旗賊二馬中礮不能行守備蔡應龍以己馬代之應龍步行短兵斃賊三人賊始敗回守村不

敢出

七月十五日清軍與洪軍戰於雙髻山

初十日卯刻清臣達洪阿烏蘭泰進兵先期約總兵李能臣副將王錦繡以兵勇千七百人由新羅塘等處攻新墟東南副將清長以黔兵過河西南列河中有沙岡一道則以楚黔兵埋伏接應約畢洪軍四面蠡擁距黔兵半里見清軍整隊持槍不發退避南邊林後別以伏兵五六百由西面林內兩林高坡突出直撲湖南香山隊湖北兵礮斃洪兵七八十名洪軍退走忽由南林繞襲湖北貴州兩隊勢難支持張敬修錦繡先後追擊斃洪兵二十餘人始退清兵追奔過河洪軍既遠走二十七日敬修在赤土村與洪軍接仗斃數十名生擒數名巴清德向榮遂督兵深入紫荆山中有風坳兩峯並峙洪軍先斷山下路壘石安礮於坳上兩邊山梁復設望樓及草棚數百間以爲踞守巴清德榮乃與各鎮籌商非三路齊進奪據山梁不能拔此險隘遂以潮勇爲頭隊四川湖北兵爲二隊由東上山鈔洪軍

之左陶昌培陽瑞乾爲首隊廣西兵爲二隊由西上山鈔洪軍之右一面飛至烏蘭泰前路揚旗放礮以分洪勢八月初二日銜枚疾走至山麓齊放槍礮進攻洪軍棄隘敗走清兵奪取風門坳洪軍墜崖死者無數追奔至古調村外抵死拒戰清兵擲火彈焚燬村房洪軍從村後逃復將所占各村燒燬已去新墟不遠寅刻巴清德榮督兵進至平山方度地列營探報洪兵千餘藏古林社內乃撥兵迎戰長瑞劉長清率川楚兵由山梁橫衝斃洪兵數十洪兵仍由村後走時烏蘭泰亦令開隆阿能臣敬修礮斃洪軍五六百名（採冊云張敬修一軍駐四面塘以大礮自蓮塘廟高阜轟擊新墟典庫望樓崩其一角洪遂分兵三隊一自古練埧渡江一自羅村埧渡江左右包抄將至乃以一隊由中路過馬蝗橋清軍見洪軍至福州遂棄礮而潰

附錄採訪洪楊起事記 洪秀全馮雲山廣東花縣人道光二十六年至桂平紫荆山大冲曾至珩家教讀密訂盟約勸人同拜上帝往來博白潯州象州間

二十七年冬打山內蒙冲廟及社壇生員王作新指爲謀叛十一月二十一日起團獲馮雲山交保正曾祖光解官被會黨搶脫十二月十二日復起團獲馮雲山洪秀全曾玉珍盧六送大湟江司該司止解馮雲山盧六過縣作新將馮洪傳教呈繳稟明陽爲拜會陰圖謀叛桂平縣批閱呈殊屬荒謬該生員身列膠庠應知條教如果事有實跡則當密爲稟呈何得以爭踏社壇細故捏飾大題架控是否挾嫌滋累亟應澈底跟究候卽嚴提兩造人等質訊確情分別辦理以遏刁風而肅功令馮雲山卽以訛詐具控府憲批馮雲山所呈是否屬實仰桂平縣分別究釋二十八年盧六囚斃馮雲山幸釋二十九年會合平隘山楊秀清蕭朝貴金田韋昌輝貴縣石達開二十年八月于韋元介昌輝父家豎旗舉事地方官置若罔聞十月十四日移屯新墟分隊紮武宣東鄉甯村鄒姓家團練圍捕退回新墟武宣縣令劉作肅諭團守卡洪軍進紮牛排嶺博白象州會黨雲集封號稱王清兵與戰勝負未分咸豐元年二月初九日入紫荆山十一

日攻破雙髻卡進紮東鄉三里清軍齊集縣城時在台村後交戰三月撫憲周天爵督師武宣四月十六日洪軍由落梅大坪洞上象州至修仁石墻卡遇清兵堵截復由象州於六月初五日經東鄉下新墟後隊堅守猪仔峽清兵無從進追後由團練自雙髻山樵路繞出鷓婆石十五日黎明交戰洪軍始悉下新墟於是清兵迫近洪軍仍踞牛排嶺聲攻平南八月十六夜由鵬化山間道上破永安此後圖桂林困長沙破武昌下江西稱帝金陵人數衆多實亘古未聞焉

咸豐二年武宣賊謝玉光勾結艇賊大鯉魚行劫北河

玉光號大脚三與吳長腰四爲異父兄弟嘗糾數千滋擾江上是年復結大鯉魚等於北河一帶包船打單四年豎旗象州與來賓朱阿九象州盲公勝相角殺長腰四六年艇匪李文茂僞封玉光右護軍築寨於武宣西上里金鷄山助文茂糧攻陷柳州十一年署象州曾某招撫之同治元年十月暴死其子吳癸友匿其父

黨廖八抗拒官軍五年二月水師李德全說癸友縛獻廖八許以投誠從之充柳州提標水勇欲假散餉爲名並誅之事洩癸友遁七月獲於象州古德村歸梟於潯州

五月武宣賊何阿烏四倡亂聚匪四千餘人補村廖觀養舊墟彭榮祖林頭黃四象州韋晚糾黨應之

三年癸丑八月貴縣女賊率黨三千餘由上武賴入古煉山口下攻桂平武平里敗於仁潭寺復退入龍山監生廖大翼集貴武附近團練擊走之

二娘橋墟人年三十許每裹頭督戰賊黨赤身甘受鞭撻不稍退若忘其爲婦人元年與黃阿左黃阿右合踞貴縣覃塘至上武賴入古煉山口下攻武平里敗於仁潭寺退入龍山爲團練對敵八日大擊敗之由桂平地牛脚口走出北江已而回竄至上武賴上黃梧山田洞中團練礮轟落馬死（府志載石龍團練失實）冬貴縣賊黃鼎鳳倡亂山東石龍梁阿猷李阿花四應之武宣賊黃六倡亂朗村韋

祖芬六村張阿就石龍黃蒜頭四應之（蒜頭四訪冊亦作桂平新墟人）
四年甲寅武宣賊莫八等潛由象州竄桂平羅秀墟

莫八劉阿才李阿狗劉阿保皆東鄉人號福義堂潛由象州過羅秀爲團練擊散
合於廣義堂梁老隆黨

五年乙卯春正月流賊胡阿金踞武宣武賴村知縣朱爾輔擊敗之

初阿金以三年八月入東鄉尋由桂平蒙塘擾武宣二塘團練擊竄象州是月糾
黨五六十千踞武賴十五日爾輔厚集團練擊敗之賊渡勒馬河竄象州修仁永安
去

艇賊阿晚附陳開攻潯州尋攻武宣知縣朱爾輔招降

六月貴縣賊張金德掠桂平洛根上垠村七月金德入武宣東鄉里人入山避之無
所掠而去

冬十月廣東賊謝老母入武宣東鄉何阿烏四廖元四黃老文四率群盜附之

桂平賊朱阿狗集匪四千餘人劫慶遠思恩等境掠牛數百頭由武宣東鄉下平
南大窩賣之

武宣賊曾阿才倡亂於王年村不滿千人劫小林團練擊之遂擄大林

武宣賊覃七倡亂屯應村不滿千人不敢行劫散入紫荆山爲盜

六年丙辰春正月十六日艇匪李文茂梁培友陷武宣右江道黃輔相知縣茅本蕙
被執不屈死

何晚之降也輔相使以水師防北河同五劉彪何維杜洪忌之文茂培友積與晚
不相能知彪黨之甘心於晚密使圖焉十四夜群起鼓噪誣吞蝕軍餉攢殺諸江
遂擁衆踞城執輔相本蕙至郡本蕙爲令嚴水師恨刺骨乃鬻本蕙錮輔相漚潤
舟中不食九日死（舊志云正月十四日陳開李文茂率僞將軍楊長壽句結何
晚杜奇何微陳保等謀內應城復陷事疑失實）

二月十五日官軍克復武宣

統帶知勇吳會蘭會圍紳黃檢眞黎觀光胡祥宸等督練克武宣三月初二日潯州協副將福格率兵練防守

三月武宣賊韋祖芬句結艇匪復陷武宣副將福格守備朱錦華死之

初祖芬糾黨匪百餘沿江行劫五年聚黨數千滋擾柳城懷遠各境至是結艇賊七八千昏夜撲城內奸應之官軍不及備福格手刃數賊力竭亡於陣城復陷錦華及把總李桂芳巡檢谷集啟外委吳錦蘭死焉同死兵丁二十名婦女多名婦尋去四五月間又糾艇賊蹂躪二塘村堡

七年丁巳秋七月武宣何阿烏四襲北鄉貝貢村土匪甘啟成爲鄉導破其半村團練抵擊大敗之賊黨遁散

九年己卯朔武宣來賊劉其蘭侵占土著莊田

其蘭結群盜占取土著莊田每伺村中人出輒入其室繫殪童婦或要於路殺之哭聲不忍聞於是占三十餘村滋擾且十年同治五年代理知事劉汝棠安插來

人始還業主東鄉肅清

武宣賊劉阿連攻破古列村屠之

阿連以正月至東鄉踞河馬墟是夜初三日攻古列十五日破之屠殺男婦三百餘人明日復攻莫村會河口團練入援內外夾擊遂散

按劉其蘭劉阿連俱貴縣人彼二人至東鄉其原因由貴縣客人黃甲先黃年佛等男婦千餘被土著追遂僦居東鄉隨與尊頭村聚會合土客聯爲一宗嗣因隙操戈互相援助釀成械鬪始則追逐富興舊墟田寮石厓等數小村客人繼則堡村土人廖觀養上棉黃老文等招集桂平武平里上黃村黃亞相等率二千餘人圍攻下交河村未破時局至此勢成決裂而其蘭阿連等聞此情形知事無終止仗義赴援其蘭到東鄉不滿一月攻下武蘭村砲裂身斃餘衆散回詢諸父老猶歷歷能言之而同治癸酉修府志東鄉採輯員閉書雲訛載占三十餘村滋擾且十年此誠不經之語阿連至東鄉路經古例村該村出而攔截傷斃數命憤攻戮

之職是故也查是年八月二十一起釁事前闔鄉止一舊墟何所據而云阿連正月至東鄉踞河馬墟用敢考証補輯俾免訛傳貽後人有盡信書則不如無書之誚焉矧今民國大定五族共和方里七十萬悉歸漢土人民四百兆均屬同胞武雖偏隅下邑而風聲遙聽峒獠之强悍不生仁讓並興土客之猜嫌胥泯行見物阜民安書登康樂豈不懿歟東鄉採訪

二月平南賊陳宗江句引武宣賊劉廣福襲踞花王村

十一年辛酉春三月統領楚軍劉坤一由象州克武宣艇匪陳開遣賊目虎頭仔張大口迎拒之清軍三戰三捷遂克武宣

同治二年癸亥六月官軍克武宣朗村擒土賊韋祖芬莫阿猛誅之

祖芬以咸豐三年作亂六年陷武宣二塘至是與阿猛由朗村出援黃鼎鳳參將廖國安遊擊洪日高都司劉揚勦之斬祖芬初七日破朗村禽阿猛僞先鋒黃六遁四年團總張鳳斬之

五年丙寅春首民某縛土賊廖八獻之

廖八以咸豐四年出沒武宣象州間是月潛匿金鷄巖招集舊黨首民縛之以獻十二月代理武宣知縣劉汝棠勦土賊黃進四於北敢村中砲死署知府王達材擊平之

初進四與其兄弟老群老利老元等以二年附黃鼎鳳滋擾桂武邊境屢抗官軍遂踞北敢村與陳大六二稱十八羅漢人民多被慘害團紳覃遇春覃天佑等捐輸助餉請官軍勦之是月二十八日汝棠攻寨深入中砲陣亡明年正月署知府王達材副將達三率團紳黃檢真圍北敢村進四負固死守二月代理武宣縣梁俊參將黃才貴在籍副將陳超宗等攻其巢進四縛黃東漢以獻謂實戕汝棠因詭詞求撫才貴佯許之三月進四伏誅攻破北敢誅黃老詳等僞軍師陳洪範先期遁尋因訟誘羈獄中瘦斃北敢平以該村地險人頑明時曾作亂戕官諭該村人民徙遷別處其遺址永不准再造村庄紳民刊碑垂記

六年丁卯代理武宣知縣梁俊計殺土賊楊長壽

初長壽受陳開僞官攻陷武宣已又踞灣龍村丙寅七月復糾黨踞盤古二村代理知縣劉汝棠督道德軍剿之賊退竄灣龍劫掠如故至是俊始殺之以上係錄府志

光緒二十一年桂平匪首劉猪郎六率黨滋擾東鄉團紳劉炳亮劉麟三炳熙等擒斬之

按夏府稟上游云劉猪郎六勇術高强能避砲碼柳潯兩府地方商民多被蹂躪等因經府懸賞緝拿是年炳亮等奉府諭於七月十四日購線擒斬送府示衆

二十六年桂平南匪首馬威南嚴水矯在柳江一帶聚黨搶擄東鄉團紳梁得齡劉炳熙劉耀辰等擒之

按二匪首嚴固強橫而馬尤凶惡著名有力善鬪前則豎旗攻打大橫江該縣及府曾出重賞購緝後則聚黨百餘盤踞縣屬良村專劫柳江上下船隻是年十二月酷捉前縣令呂得鰲抗拒官軍手殺弁目數人二十七年擾及東鄉經該團紳

等偵悉正月二十一日督練擒拿送呂縣解府正法梟首良村示衆

二十八年廣東高州會匪首吳洪金專事拜會搶劫地方東鄉團紳劉炳熙劉耀辰梁得齡督練擒之

按該會匪二十三四年專以三點會煽惑鄉愚入會甚衆到處滿布羽黨勢甚披猖二十五年五月聚黨千餘殺猪豎旗欲攻縣城先打石狗村以謀根據經前清蘇宮保元春親統大兵馳救勦散隨經楊前縣和墳懸賞諭拿是年正月二十一日偵悉窺東鄉該紳等率練擒送曾前縣紀壽正法

祿村區軍務

明正德二年來賓匪首韋學祖覃萬祖覃公天等糾黨擾亂來武霸佔民田屢征不服正德十五年郭總兵委黃鎮台有羣由柳州率軍屯於祿村團紳陶永舉獻計誘該股匪匿於來賓屬之橫嶺村背滴水巖然後舉兵屯圍二閱月始平之嗣將巖口封固清道光己酉二十九年匪首除阿潰率黨擾亂祿村區屯紮河龍一帶村右江兵備道黃統兵進勦團紳黃煥章梁璵黎星燦率團襄辦先使奸細誘散匪黨羽匪遁據思畔山環而攻之匪懼竄去光緒五年逆首黃老壽聚黨滋擾區內以篷筭山爲巢穴葵軍門金章統兵征勦團紳錢世寶韋敬端梁承玳黃斗昭覃超群等率團襄辦圍攻其巢三晝夜平之光緒二十一年逆首韋老恩蒙老開結黨橫行劫掠區內鷄犬不寧二十二年潯州府夏敬頤會柳州府梁廷選統軍臨勦團紳韋敬端錢世寶張國祥覃培蘭蒙上璠等督團襄辦先散其黨羽後乃設計誘擒之二十七年餘黨覃老泰復爲逆首勾結游匪攘亂來武二邑境界柳州府周會武宣縣王鼎昌武宣縣志卷十三

祿村區軍務

廿二

梧州商業日報承印

統兵勦之周府被匪槍斃於來武交界古逸甘藏山下厥後廣西巡撫王之春統軍抵武宣團紳韋敬端錢世寶張國祥覃培蘭黃祖瑜復督團襄辦剪除其黨羽而後老泰遂爲來武團練擒獻地方始平

金鷄廟王黃茅軍務

清咸同間逆匪謝大脚三盤踞金鷄大巖擾害地方嗣後又有長腰四之子吳貴有據大巖爲巢於大河岸私設關卡勒稅商船至同治乙丑年有團村廖八者因讐仇起衅攻破同村蒙振梁之家遂乘機作亂勾引新墟山東石龍東鄉匪黨二三千人蹂躪北上里三十餘村暨西上里一帶而良村奸紳李正生實助其惡黃茅團紳梁之桐梁毓材郭司城黃作興覃杰士金鷄團紳覃忠善廟王團紳蒙振梁覃天叙羅天佐等稟請縣令王大鈞彙報大憲次年隨派梁俊曹福祿帶道德二營勦之諸紳籌餉督練襄官軍進勦廖八乃竄至金鷄岩爲吳貴有藏匿兵練圍捕勒令吳貴有繳出廖八解到桂林轉提柳州正法地方始獲安靖

南鄉軍務

清道光己酉二十九年武平白洞村賊覃亞兒糾率匪黨數百人擄花馬覃志剛歸由古煉隘入爲龍山團練擊敗三十年東鄉匪首陳阿潰率匪黨千餘人由勒馬渡江攻陷灣龍上馬來二村焚劫咸豐三年貴縣女賊邱二娘偕匪目黃亞左黃亞右率黨千餘人從武上里下仍由古煉隘入下武平滋擾敗退龍山復擊敗之四年十二月二十五日匪紳廿七率匪黨千餘人攻劫古樸村八年貴縣山東石龍匪首梁游三率大股匪焚劫大覃村旋圍攻古樸二旬餘不陷同年攻陷人和村十年九月中旬山東石龍李花四彭六高金龍等先率匪黨數百人突入中灣村劫掠駐紮爲巢遂糾合覃塘匪首黃三羽黨將及萬人圍攻古煉村於時廖大翼令廖廣準帶龍山團練入內守禦賊百計狡攻不能陷至十一月末旬賊股始退去賊黨猶時常往來中灣祿博二村田園半就荒蕪次年春始敢歸耕同年李花四又率匪屠龍宮村大小男婦遇害三十餘人又灣龍匪首楊長壽馮四亦是年攻打下安村不陷復攻

東鄉軍務

游匪蘇泗隆黃雲甫于光緒癸卯年九月聚黨數百占據象屬王田村四出搶掠擾及東鄉叻桂村勢焰日張象州官率兵團進勦又復敗績於是望風畏懼局紳梁得齡劉炳熙劉耀辰等慮其滋蔓籌款募練稟請潯州彭守言孝於甲辰年三月二十三日帶兵進勦襄辦者梁得齡劉炳熙劉培球彭尙鏞王耀官督練作鄉導者劉耀

辰劉炳宇劉永祿梁在家等由兵坪沙梨坪兩路進兵是夜兵坪一路兵練迫上王田對面筆架山匪聞風爭佔二十四黎明交戰匪前後包抄適沙梨坪一路兵練又到匪卽退守該村以是兩路夾攻戰至申刻匪敗竄由村後山路逃遁追攻片時天近昏黑匪卽向高秀凹竄逸地方得以粗安實當日痛勦之力也

二塘區寇盜軍務略

清咸豐四年甲寅渠塘村韋鳳岡與燈盞村熊永康波灌村黃檢眞等同心督帶團練勦滅黃花村惡匪吳亞德亞九等地方賴以安靖光緒庚子年二塘墟覃鴻兵石耆村趙茂榮趙振三趙貴孫趙百七趙祖熙趙百八趙苟叩回龍村張永成樂業村李老年等勾引廣東高州匪首吳洪金入境附平田村陸天開作亂欲撲武宣城先攻石耆村楊縣主和埧電請蘇宮保元春與柳營派大兵救援事平查點各匪首田塘屋地充公至曾縣主紀壽發賣其價銀撥歸闔邑建高等小學校經費宣統三年辛亥十二月回龍村李亞美帶匪黨數百回攻縣城打單於二塘墟擄掠局中財物

民國二年癸丑春正法唐知事劉委員檢獲正法縣屬粗安

民國元年事畧

清宣統三年辛亥九月十七日廣西諮議局暨軍政商學各界策應武漢革軍起義擁戴清巡撫沈秉堃爲都督布政司王芝祥軍門提督陸榮廷爲副都督通電各府州縣反正獨立贊成共和武宣縣令操持受潯守賀延清心違獨立之影響懷疑觀望物議洶洶經自治籌辦所長劉炳熙暨局紳郭尙貞廖克修勸學所總董張懷玉邑紳陳金聲覃炳崧等先後進勸操令始允公布獨立遂開全縣大會赴會者二百餘人由張懷玉宣布獨立大義余瑞麟陳朝富相繼演說維持治安大畧當衆議決留管帶國民軍第十五隊劉炳剛駐防武宣組織民團公所舉覃炳崧劉炳熙爲正副所長郭尙貞陳壽昌爲幹事聯絡各區召集團練共維秩序十月初一日革命黨急進派大起民軍破平南攻潯州聲言先逐心違獨立之賀守次攻武宣因疑操黨賀故也不知操令素明大義誠贊共和頗爲地方人民所信服當潯城受困時武宣

謠言紛起大勢岌岌公推覃炳崧陳壽昌冒險趨潯向革黨解釋疑團民軍乃止攻武之行當潯圍未解時武軍不克向潯關領餉因請駐洪水統稅晏督辦權撥柳州餉項暫濟武軍而柳州軍政分府不允委員李果來武提欵晏督辦因應兩難幾啟兵端民團公所力爲調停迄十月中旬潯圍解後軍餉有着柳武風潮始息反正之初人心浮動全縣錢糧雜捐觀望不納衙署局所仰屋同嗟十一月中旬奉軍政府電令取銷民團公所如例組織議參會舉覃炳崧劉炳熙爲議長郭尙貞覃先澄陳夢昌余瑞麟爲參事員黃肇熙爲監理財政員集會各區自治局議董會議定抗糧抗捐懲戒規則當局員紳身先完糧以爲表率一面將共和國民應負擔租稅義務享有共和權利當衆演說地方感悟相率完糧納捐官廳局所始可支持時沈王兩督相繼統隊北伐陸都督由邕赴桂任事委員在各府徵集綠林編入軍隊預備北伐以遏亂萌不日額溢餉絀健兒之未入伍者亦自組北伐隊謀以激烈手段爲籌餉地痞乘機蠢動四出劫搶兵力單薄不能制河干一帶黨衆千餘截搶河道漸逼

城廂謠傳駐城軍隊民團皆允內應於民國元年二月初二夜（卽舊歷十二月十五）暴徒蠡集攻城在籍省議院議員周維宗聯絡商會立募巨金犒賞軍士劉炳熙覃炳崧參謀機宜管帶劉炳剛商練哨長黃金榜民團哨長黎式容黎式金等各督所部兵士櫻城固守初三早縣長古祥炎專差趨來賓潯州發電乞援信夫譚亞作至新路橋遇害張懷玉覃松華覃炳崧等先後犯圍出城起圍商董李長勇由勒馬遣舟報潯劉耀辰劉德漢劉炳麟梁幹材刁兆森等率東鄉團犯圍入城協力守禦武子興武繼猷武長猷等率中和團郭尙貞周思泉覃焯勳高文標等率桐嶺團黎培基陳賢書等率馬步團郭尙青率護商勇先後應援歷三晝四夜匪偵知內外受敵漸行潛退二月初六炳剛率隊出城搜捕在城廂東北隅擒獲匪徒七名立即斬決以快人心劉統領炳宇由柳聞報統率所部沈曾兩督帶及管帶陳鴻慶劉炳權等軍隊星馳赴援匪已遠颺匿跡武宣之圍卒解縣城危而復安炳宇奉令督辦善後寬嚴並用擇尤擒斬是冬全省大舉清鄉委員劉旋葵知事唐朝繩管帶劉德

漢等計誅要匪李亞美等數十人地方粗安

武宣縣志卷十三

祿村區軍務

廿六

梧州商業日報承印